

## PROMOCIJA SEMERKANDA NA TRIBINI „VEČER KUR'ANA I DŽEMATA“

U subotu, 30. 1. 2010. godine u Islamskom centru Zagreb, u sklopu redovne tefsirske tribine „Večer Kur'ana i džemata“ , održana je promocija časopisa Semerkand te je održano prigodno predavanje na temu „Aktualizacija čitanja i zaboravljena vrijednost nauke kod muslimana“ . Predavači i ujedno promotori spomenutog časopisa bili su uvaženi alimi, mladi intelektualci iz Sarajeva , **dr. sc. Almir Fatić**, predavač Tefsira na Fakultetu islamskih nauka i **hfz. Nedžad ef. Ćeman**, glavni urednik Semerkanda. Hafiz Ćeman je kao prvi predavač i govornik prisutnim zagrebačkim džematlijama, ali i gostima iz Tešnja, Bihaća, Cazina i Ljubljane, koji su ciljano došli poslušati predavače, pojasnio što je to zapravo Semerkand. Ime označava sadašnji grad u Uzbekistanu. Nekada je bio prijestolnica islamske znanosti, kulture i civilizacije i baštinik ali i rasadnik muslimanskih intelektualaca poput Ebu Mensura El-Maturidija, našega imama u Akaidu. Semerkand je i naziv za Udruženje građana, utemeljenom prije 6 godina u Sarajevu sa brojnim aktivnostima kojima je glavni cilj reafirmacija islamskih porodičnih vrijednosti među Bošnjacima i drugim muslimanima. Pored Sarajeva, Udruženje Semerkand svoje aktivnosti organizira i provodi diljem Bosne i Hercegovine putem 15 podružnica. Promoviranje vrijednosti islamske porodice jedan je od ključnih ciljeva časopisa Semerkand, kazao je hafiz Ćeman. Koncipiran na način da sadrži samo afirmativne tekstove, što znači da u sebi ne sadrži polemičke stranice, nudi čitateljima raznolike tekstove iz područja Akaida, Ahlaka, Povijesti islama, Tefsira, Hadisa i drugih korisnih islamskih znanstvenih disciplina te korisne prijevode sa različitih stranih jezika sa posebnim temama za naše majke i sestre. Semerkand okuplja mlade i ambiciozne ljude, samosvjesne islamskih vrijednosti i važnosti širenja Allahove riječi na blag i jednostavan način. Poslanički primjeri pozivanja u vjeru, paradigma su za članove redakcije Semerkanda. Blagost, strpljivost i ustrajnost bili su naređeni, a ne samo preporučeni svakome Poslaniku. Za primjer može poslužiti Musa a.s., kojeg poznamo kao pomalo agresivnog zagovaratelja pravoga puta (naravno u pozitivnom smislu agresivnog), kojemu Allah naređuje da faraonu, koji je sebe proglasio božanstvom, govori blagim i umiljatim glasom ne bi li povjerovao u Istinu. Semerkand nastoji biti literatura koja odgaja i koja upravo promovira predivne primjere edeba Božijih Poslanika u njihovim odnosima sa drugim ljudima.

Nakon glavnog urednika hafiza Ćemana, predavnje na temu „Aktualizacija čitanja i zaboravljena vrijednost nauke kod muslimana“ održao je dr. sc. Almir Fatić. Kazao je kako statistika o mjestu knjige, čitanja i istraživanja danas u muslimanskom svijetu nije na našoj strani, ali zato jeste vjera. Mi smo specifičan ummet po mnogo čemu, a jedna od tih odlika je da smo, ili bi trebali biti, zagovornici Istine putem znanja, čitanja, proučavanja, istraživanja, dokazivanja, argumentiranja, a sve nabrojane ljudske odlike sadržane su u riječima IKRE' BISMI RABBIKE, prvoj Objavi časnome Poslaniku Muhammedu a.s. I zato što smo zanemarili prvu Objavu, Ummet dugo vremena proživljava dekadencu na mnogim poljima ljudskih djelatnosti. Naš Ummet još uvijek nema izgrađenu kritičku i analitičku misao kakvu su razvili europski narodi. Na rješavanju tog nedostatka moramo svi poraditi.

Dr. Fatić se također osvrnuo na ciljeve časopisa Semerkand. Svojim tekstovima Semerkand, šiiri i promovira moralne vrednote u vremenu sveprisutnosti grijeha. Naša civilizacija je civilizaciji multipliciranja grijeha. Moral je na Zapadu izgubljena vrijednost. Postao je stvar mode. Mi muslimani možemo zapadnom čovjeku pomoći da ga opet pronađe, jer samo mi imamo pravu Istinu i još uvijek donekle imamo sačuvanu porodicu. Naravno, prvi uvjet je da prvo sebi pomognemo i to ponovnim aktualiziranjem iščitavanja, tumačenja i primjene Kur'ana i Sunneta u svakodnevnom životu. Zato nam je potrebna sasvim nova Metodologija tumačenja vjere i doza odgovornosti naspram tumačenja. Tumačiti vjeru ne može svatko, a to nam se nažalost često događa. Ako bi se mogli ukratko sažeti ciljevi Semerkanda onda bi se oni ogledali u promociji znanja, ibadeta, zikra i edeba, zaključio je dr. Fatić.

M.Mešić